

Картаева Л.Г., старший преподаватель лаборатории этнокультурного образования ГБУ ДПО РМ «Центр непрерывного повышения профессионального мастерства педагогических работников – «Педагог 13.ру»;
Калигина Т.И., учитель русского языка и литературы, родного (эрзянского) языка и родной (мордовской) литературы МБОУ «Урусовская СОШ».

**Внеклассное мероприятие:
Поэзиянь чокшне – вастовома "Сырнень гайтть".
Алтазь поэтэнтень А.С. Кадоркиннэнь**

Сценанть вельксэ А.С. Кадоркинэнь портретэзэ, невтезь чачома-куломань иензэ. Портретэнт ало валт:

*«Мезде а сермадовлинь, содадо,
Свал сермадан ансяк эсень шкадо».
А. Кадоркин.*

Нетъ кавто строчкатне сермадозь покшто, мазыйстэ. Седе ало теезь книгань лавсят. Эйзэст путнезь «Сятко» журналонь номертнэ, конатнесэ печатазь А.С. Кадоркинэнь стихотворениянзо ды поэманзо. Теске сборникензэ: «Садо миненек праздник», «Эрясь – аштесь овто», «Герди чачома мастором», «Кизна Дубровкасо» ды лият.

Гайги эрзянь народной морось. "Вай, верьга, верьга". Сценанть лангс лисить ветицятне.

Ветицясь:

Шумбрачи тыненк, вечкевикс ялгат! Паро мельть-превть тенк вечкевикс инжеть!

Минь ушодсынек "Сырнень гайтть" поэзиянь чокшненть-вастовоманть, кона алтави Александр Сергеевич Кадоркиннэнь.

Бути тынь соватадо велень библиотекас, кевкстыдо кодамояк книга Кезэренъ Грециядо, Италиядо эли Китайде - сеске тенк мусызь эли ёвтасызь, косто саемс. Кевкстиндерятадо мезеяк Илья Батяйкиндэ, Михаил Вильдяевде, Александр Кадоркиндэ - якстерьгавтсынек библиотекареенть: нетъ поэтнэде сынъ мезеяк а содыть. А мезть сёпамс: эрзя-мокшонь литературанть лангс явови вишкине мель. Сайсынек, мертяно, А.С. Кадоркинэнь. Мезе содатано эйтэнзэ? Аламо... Секс ули мелем евтнемс те поэтэнтъ-патриоттонть.

А.С. Кадоркин чачсь 1938-це иестэ Атяшевской районь Козловка велесэ. Семият эрясь кажочисэ. Сашань авазо, Мария Андреевна, важдось колхозсо. Сон содась эрзянь ламо морот ды вечксь морсемест. Кавксо

эйкакштнень эйстэ Саша сехте покшоль. Секс тетязо-авазо важдеме туемстэ кадылизь кудваныйкс, сазортнэнь ды ялакстнэнь симдицякс-андыцякс. Сергей Иванович, Сашань тетязо, ульнесь Великой Отечественной войнасo, косто велявтьс кедтеме. Сон тонавтсь цёранть киньгак ды косяк а манчемс, эрямс виде койтнень коряс.

Саша Козловкасo прядсь васня начальной, мейле - средней школа. Тесэ тонавтнемстэ пек кармась вечкеме тиринь келенть ды литературанть, сонзэ седейсэ кирвазсь сермадомань мель. Пек лездась тенень тиринь келень ды литературань учителесь Прошкин Павел Григорьевич.

Средней школанть прядомадо мейле Кадоркин служи армиясо. Сёрмадомо бажамось сонзэ эзь кадно тесэяк. Вечкемс поэзиянь - те аламо. Саша чарькодсь: стихень сермадыцянтень эряви ламо содамс.

Солдатонть седейсэ чистэ чис кемекстась, виензась мелесь тонавтнемс седе тов. Те бажамось топавтовсь армиясто велявтомадо мейле. Александр Кадоркин кармась тонавтнеме Мордовской государственной университетэнь историко-филологической факультетсэ. Сонзэ парсте прядомадо мейле роботы Чаунзань буень школань директорокс, учителекс. Мейле сон тонавтсь тиринь кель ды литература Ицялонь буесэ.

А.Кадоркинэнь лемесь сеетьстэ кармась вастневеме эрзянь журналтнэсэ, газетатнесэ.

Меельце иетнестэ поэтэсь важди Тюменской областень Сургут ошсо. Тесэ сезевсь поэтэнтэ эрямозо. Сон пек вечкелинзе тиринь велензэ, сонзэ ломанензэ, перть пельксэнтэ.

Ялганзо топавтызь меельце энялдоманзо: поэтэнтэ калмизь Козловкань калмазырьс 1993-це иень ожоковонь б-це чистэ.

А.С. Кадоркин тусь юткстонок, а вана поэзиязо, прозазо эрить, кармить эрямо.

А. Кадоркин вечкезь сёрмадсь кода покштнеде, истя вишкинетнедеяк. Сон вадрясто содылизе пакшанть оймензэ, мелензэ-превензэ, парос бажамонзо.

Теде вадрясто кортыть эйкакштненень алтазь "Садо миненек праздник", "Эрясь-аштес овто" стихень пусмонзо, "Кизна Дубровкасo" повестесь.

Сайсынек "Ояз" стихотворениянтэ. Эйсэнзэ невтеви, кода эйкакштне вечкить нармунтнень, мелявтыть сындест.

"Ната ды шекшата" стихотворениянтэ ловны Катя.

Кадоркинэнь лирикасо пек вечкезь сермадови природадонтэ. Ды кода сонзэ а вечкемс! Сонзэ чевте элесэ чачсь-кассэ поэтэсь. Сонзэ вельде лиссь ломанекс.

"Лейне" стихотворениянтэ ловны Даша.

Ломанесь ды перть пельксэсь кеместэ сюлмавозь эсь ютковаст. Перть пельксэсь мазылгавты ломаненть ежонзо, раштавты виензэ. Секс, нать, природань лирикась саи покш тарка Кадоркинэнь поэзиясоjak. "Теле", "Гундо", "Сырнень сёксь" ды лия стихотвореният икеленек панжови свал лия ды а стувтовикс пейзаж.

Стихотворениянтъ "Ки" ловны Дима.

Природань картинатне сонзэ поэзиясо валдот, чевттъ. Вана кода мазыйстэ невтеви велень валскесь истямо жо лем марто стихотворениясонть.

А куш, а каш, ансяк пильгало
Чикорды ульцянь келес лов.
Сувось перькат, прок ловсо валовсь,
А максы ваномс тетъ васов.
Якшамо! А варака карны,
А ояз лиси костояк...

Стихотворениянтъ "Ловонь атя" ловны Гена.

Покш тарка Кадоркинэнь лирикасо саи гражданской тематикась: эрямосонть поэтэнтъ ды поэзиянтъ таркадост, тиринь масторонок вечкемась, эсь масторонтень лезэнь кандомась. "Цёков" стихотворениясонть алкуксонь поэтэсь аравтови мазыйстэ морыця нармунентъ ваксс. Сонзэ кунсолозь поэтэсь арси:

"Тонгак морат-сёрмадат стихть,
Морот, но иляк стувто, кодат
Паро морыщятне эрсить..."

Поэттэ ды поэзиядо Кадоркинэнь кой-кона стихтнесэ маряви седейризкс. Те парсте неяви "Арсема" стихотворениясонть.

Пайстомо алашакс мон маряса прям.
А неявикс ашкосъ ёзызе кирьгам...
Мезть улавсон зняро стакасто ускан -
Берянь эли паро?
Мон теде аздан.
Паряк, канстон сырнень,
Паряк, идем кевтъ.

"Мекс седеем поти ризкс" стихотворениянтъ ловны Ольга.

Поэтэсь весе седейсэнзэ вечксь чачома велензэ, сонзэ ломанензэ. Тиринь энксонть эйтэ туемась маряви тензэ авасто явомакс.

"Но таркась, косо тон чачить, эри седейсэть куломазот"...

Покш смусть ули неть строчкатнесэ. Секс сынъ теевсть валмеревксэкс.

Меельце иетнестэ поэтэсь важдось покш произведения лангсо - сермадсь поэмат: "Давол", "Дезертир", "Чинтъ ды ковонтъ ало".

"Дезертир" поэмась алтазь Великой Отечественной войнань шкантень. Произведениянь главной героесь Андрей явсь вечкевикс нинзэ ды эйдензэ эйтэ тюремань васень читнестэ. Героесь эсензэ сельмсэ неIZE войнань кажонт-апаронт. Вейке стака тюремадо мейле сон оргоди, тееви дезертирэкс - велявты кудов. А кувать талномадо-ризнэмадо мейлек сон велявты фронтов, бажи идемс чумочинзэ. Героесь прынзо путсы масторонзо кис, кулы героекс, лемезэ сермадозь обелискс.

"Давол" поэманть ловносызь Ольга ды Алина.

Поэтэсь свал мольсь эрямонтъ марто вейсэ. Сонзэ талновтыть сеть кевкстематне, конатне эрва ломанентъ седейсэ: войнась ды мирэсь, эрямось ды куломась, вечкемась, уцяскась. Нетъ кевкстематнень коряс поэтэсь ёвты мелензэ-валонзо "Чинть ды ковонтъ ало" поэмасонзо.

Кода а лецтямс "Ютасть ламо пиземеть-вармат" стихотворениянтъ, кона алтазь гражданской тематикантень. Сонзэ эйсэ ёвтнезь пек ламо. Тиринь школань прыдомадо мейле ламо иень ютазь вастовсть ялгат.

"Умонь пакшат, цють ашержей прят,
Аволь азорт-инжетъ эсь велесэ".

Поэтэсь витьксты ды сялдозь ладсо корты эседензэ ды умонь ялгадонзо:
"Эзь панжо Америка кияк...

Пря допрок шнамс амейсэ миненек.

Укстат, а мезть ульнесь лытамскак

Да та-кува ёмавтнемс иенек.

Кадоркин - учитель, патриот - важдось прянь апак жаля, эсь масторонзо, народонзо кис мелявтозь-ризнэзь.

1991-це иестэ "Калмсить раськетъ" стихотворениясо сёрмадсь:

Зярдю кулан, ды врач панжсызь седеем.

Кадык а дивсить, мекс сон наксадсь чачк:

Ламо зыян масторонтъ лангсто неинь,

Ламо мелявкст ютасть седеем пачк".

Течинь вастоманок прыдовсь. Паро мельть-превть тенк! Уледе шумбрат!
Вастомазонк!

Тевс нолдазь литературась:

1. Кадоркин, Александр Сергеевич. Большая вода [Текст]: [Стихи]: [Для мл. школьного возраста] / Александр Кадоркин; [Перевод с мордов.-эрзя В. Егорова]; [Худож. А. Коровин]. - Саранск: Мордов. кн. изд-во, 1976. - [22] с.: цв. ил.; 28 см.

2. Кадоркин, Александр Сергеевич. Зовут родные места: Стихи и поэма: [Для ст. шк. возраста]/Александр Кадоркин. - Саранск: Мордов. кн. изд-во, 1987. - 28,[2] с.: ил.; 16 см.

3. Пичеть. Толбандят: Стихть/ А.С. Кадоркин, Н.Ф. Мокшин. - Саранск: Мордов. кн. изд-вась, 1996. - 30 с.: ил. - [ISBN 5-7595-1133-5](https://www.isbn-international.org/number/5-7595-1133-5): 700.00 Сосны; костры. – на мордов.-эрзя яз. книга-перевёртыш.

4. Мокшэрзянь литературань программат. 5 -11 классенди/
[Сёрмадозь: А.И. Брыжинский, А.М. Каторова, Е.И. Азыркина]. – Саранск:
Мордовская книжная издательствась, 2010. – 96 с. – Мордов.-мокша яз. ISBN
978-5-7595-1839-6: Программы по мордовской литературе. 5 – 11 кл.